

Pangasinan - Salimbeng Masanton Sulat - Protection Scriptures

Jeremias 1:18/19 Dengel ka, Jeremias! Onsumpad sika so balang sakey a too ed sayan dalinsaray arari ed Juda, saray opisyal, saray papari, tan saray totoo. Balet natan iitdan ta kay biskeg, pian nasumlang mo ra; magmaliw kan singa siudad ya aliber na padir, singa balatyang a lusek, tan singa gansan padir. Ag da ka natalo, ta wala ak ed sika a mangyagel ed sika. Siak, say Katawan, so nansalita.

Ezekiel 3:18 No ibagak ed sakey a toon maoges ya ompatey balet et ag mo pinasakbayan a mangoman ed bilay to pian nipaliis ed patey, sikakasalanan ya ompatey, balet singilen ta ka lapud impatey to.

Jeremias 6:27 Jeremias, subok mo ray toook, a singa panggugol mod mital; subok mo ra, ta nengneng mo no antoy kapara ra.

Levitico 26:19 Patondaen koy ontan lan inkamapaatagey yo; anggapoy ompelag ya oran, et onmaga so dalin yo tan onawet a singa balatyang.

Deuteronomio 23:5 Balet say Katawan a Dios yo et ag to dinengel si Balaam; impagmaliw to ni ingen a bindision imay samba, lapud inaro to kayo.

Roma 12:21 Ag ka padadaeg ed maoges; nepeg mo ingen a daegey maoges diad panamegley na maung.

Salmo 143:8,10 Ipanunot mo pad siak kapag kabwasan so ag mangoman a panangarom, ta manmamatalek ak ed sika. Itorom pad siak so dalan a nepeg kon laen, ta mikakasi ak ed sika. 10 Sikay Dios ko; ibangat mo ak pan mangonur na linawam. Ipanengneng mo pad siak so kamaungan mo tan iwanwan mo ak pad dalan ya anggapoy kaatapan.

Salmo 94:12 Katawan, agaylay liket na toon bibilinen mo, say toon babangatan mo na ganggan mo!

Probirbio 27:12 Saray totoon ikakana ray olo ra nanengneng dan onsasabi so kaatapan et paliisan da, balet say toon kulang na kanunutan subaen to et nasagmak toy kairapan.

Filipos 2:16 legan yon ipupulong ed sikaray salitan mangiter na bilay. No onyay gawaen yo, nayarian ta kin ikinun no Agew nen Cristo, ta ag adarak iray sagput tan kimey ko.

Isaias 49:4 Inkuanko, Nankimey ak, et anggapoy kabaliksan so impansagput ko! Inoput koy amin a biskeg ko, balet anggapoy agawaan ko. Anggaman ontan napanmatalkan koy Katawan a mangyaalagey na kanepegan ko: tumangan to ak lapud saray gagawaen ko.

Salmo 76:3 Diman to pinoter iray pana da ray kalaban, saray samper tan saray ispada ra, tan amin ya armas dan para bakal.

Hebreo 13:21 Iter komun na Dios ed sikayoy amin a nakaukolan yo, pian nagawaan yoy linawa to, tan gawaen tod sikatayo komun, diad

panamegley nen Jesu-Cristo, so makapaliket ed sikato. Nagalang komun ya angkad angga! Amen.

1 Corinto 16:15 Agagi, kabat yoy Estefanas tan say pamilya to; sikaray inmonan nagmaliw a Cristiano dimad Acaya, tan insaklang day bilay da a manlingkur ed saray totoon pinili na Dios.

Filipos 1:27 Kanyan, agagi, gawa yoy anggaay nayarian yon mambilay onung ed Maung a Balitan nipaakar ed Cristo. Diad ontan, makakar ak man ditan a nanengneng ta kayo o andi la, narengelan kon mansiansia kayod saksakey a getma tan mankakasakey kayon mangyagel ed Maung a Balita.

1 Corinto 15:58 Kanyan, inararok iran agagi, mansiansia kayon malet tan ag nagiing. Mankoli kayod panagkimey a para Katawan, ta amta yon ag nadarak so pansasagput yod Katawan.

Colosas 4:12 Papaibanoan met so sakey nin kabyangay moyung yo, si Epafras a managlinkur nen Cristo Jesus. Masimoon ton ipipikasi lawas a magmaliw kayo komun a mabiskeg, tan ayadyari ya anggapoy panduaruwaan ed panangonur na linaway Dios.

2 Arari 19:34 Iyagel ko yan siudad lapud sikatoy pakagalangan ko tan lapud samay sipan kod kinen David ya aripen ko.

Jeremias 15:20,21 Diad sarayan totoo pagmaliwen ta kan singa puron gansan padir. Labanan da ka, balet ag da ka natalo. Wala ak a mangyagel ed sika tan mangyarawid sikad kaatapan. 21Iyagel ta kad pakayari na saray maoges tan maruksan totoo. Siak, say Katawan, so nansalita.

Salmo 55:18 Ipawil to ak ya ag adiwit manlapud saray pibabakal ko ed saray amayamay a kalaban.

Ezekiel 30:24 Insan ko pabiskegen iray taklay na ari na Babilonia tan ipabemben kod sikato so ispadak. Balet poteren ko ray taklay na ari na Egipto, et manayay tan ompatey ed arap da ray kalaban to.

Puyan 3:18 Kanyan sisimbawaen ta kan manaliw kad siak na balituk a pinapurod apoy, pian magmaliw kan mayaman. Manaliw ka met na ampotin kawes, pian nasakuban moy makapabaing ya inkalakseb mo. Manaliw ka met na tambal a para saray matam, pian makanengneng ka.

1 Juan 3:17 No mayaman so sakey a too tan sankanengneng ton maniirap so agi to et ag to kasian a tulongan, panoy pangibaga ton inaro toy Dios?

Isaias 50:4 Imbangat na Katawan a Dios ed siak so salitaen ko, pian napabiskeg ko so linawa na toon mapaga. Kapag kabwasan iitdan to ak na pilalek ya ondengel ed ibangat to.

Salmo 18:39 Iitdan mo ak na biskeg a mibakal, tan pananalo ed saray kalaban ko.

2 Samuel 22:40 Iitdan mo ak na biskeg a mibakal, tan pananalo ed saray kalaban ko.

Salmo 89:43 Ginagawam ya andi-kakanaan iray armas to, tan impatalom ed bakal.

Ezekiel 13:6 Tila ray pasingayew tan saray pasakbay da. Ibabaga ra a saray salitak so ibabawag da, balet diad tuay tua ag ko ra imbaki. Balet iilaloan dan ontua ray salita ra.

Levitico 26:37 Mantatabunan kayod katumba yo ya anggan anggapoy onoosil ed sikayo, tan ag yo nalabanan iray kalaban yo.

1 Corinto 14:8 Tan no aliwan malinew so panawag na trumpita, siopay mamparaan a mibakal?

Job 15:24 taktakoten na kapagaan tan ipatey a singa ra arin akaparaan a mibakal.

1 Awaran 12:8 Saya so kangaranan da ray bantug tan maung a sondalo a kabyangan iray tribu nen Gad ya akikasakey irad saray sondalo nen David nen sikatoy walad tirinsira ed kalawakan. Marunong iran mangikanay samper tan pika, masebeg a singa lion so nengneng na lupa ra, tan matalabit iran singa ulsad palandey.

1 Awaran 12:33,38 Zabulon: limamplon libon matoor tan napanmatalkan a lalakin akaparaan a mibakal, tan nipasal iran mangikana na antokaman ya armas; 38 Amin da ra yan sondalo ya akaparaan a mibakal, linma rad Hebron ta tinibokel dad kanunotan da a gawaen si David a manarid intiron Israel. Akikasakey met ed sayan getma iray arum nin totood Israel.

Lucas 10:19 Dengel kayo! Initdan ta kayoy pakaoley ya onggatin ed saray oleg tan alakdan, tan maneral na amin a pakayari nen Satanas. Anggapoy makarigsod sikayo.

2 Corinto 7:10 Ta say ermen a manlalapud Dios omanen toy puso tan mansumpal ed kilalaban, et ag itan nepeg a panermenan! Balet say ermen a manlalapud sankamundoan mansumpal ed patey.

2 Timoteo 2:25,26 maoyamon mametek ed saray onsumlang ed sikato, ta ag la pigan saraya et itdan iray Dios na pankawnawan mampataulid kasalanan da tan naamtaan day katwaan. 26 Diad satan, ompawil irad dugan liknaan da tan nibatikan day patit nen Diablo ya angerel tan amasoot ed sikaran mangonur na linawa to.

Nehemias 4:15 Nadngelan na saray kalaban mi a naamtaan miy pankokomplot da kanyan abirbir dan say Dios et ginawa ton andikakanaan iray plano ra. Insan pinmawil kamin amin a nankimey ed padir.

Salmo 73:24 Iwawanwan ak na pananimbawam et diad kaonuran, mapagalang ya awaten mo ak.